



Ein cyf/Our ref SF-MD-2016-14

Kirsty Williams AM  
Darren Millar AM  
Elin Jones AM

14 Gorffennaf 2014

*Annwyl Aelod,*

### Adolygiad o Fuddsoddi mewn Addysg i Weithwyr Iechyd Proffesiynol

Mae Llywodraeth Cymru'n buddsoddi mwy na £350m bob blwyddyn ar gefnogi dros 15,000 o fyfyrwyr a hyfforddeion ledled Cymru sy'n ymgymryd â rhaglenni ym maes iechyd. Mae hyn yn cynnwys addysg i israddedigion, ôl-raddedigion yn ogystal ag addysg broffesiynol barhaus. Rwyf am sicrhau bod y trefniadau sy'n sail i'r buddsoddi hwn yn helpu i gyflawni'r newidiadau y mae eu hangen yn y gweithlu er mwyn darparu gwasanaethau cynaliadwy yn y dyfodol. Rwyf, felly, wedi penodi panel i adolygu buddsoddiad Cymru mewn addysg i weithwyr iechyd proffesiynol.

Caiff yr adolygiad ei arwain gan Mel Evans, Cadeirydd Bwrdd Addysgu Iechyd Powys. Aelodau eraill y Panel fydd Dr David Salter, cyn Ddirprwy Brif Swyddog Meddygol Cymru, yr Athro Ceri Phillips, Athro Economeg Iechyd yng Nghanolfan Economeg Iechyd Abertawe a Mr Dick Roberts CBE, Dirprwy Ganghellor ym Mhrifysgol Caerdydd a chyn Gyngorydd Optometrig Cymru.

Bydd yr adolygiad yn ystyried nifer o faterion gan gynnwys:

- Natur y buddsoddiad presennol mewn addysg i weithwyr iechyd proffesiynol - yr hyn yr ydym yn ei ariannu ac a yw hyn yn darparu'r cymorth angenrheidiol i'r gweithlu gofal iechyd yng Nghymru;
- Sut y mae'r buddsoddiad hwn yn dwyn ffrwyth;
- Y trefniadau presennol sydd wedi'u sefydlu ar gyfer cynllunio canolraddol a thymor hwy yn y GIG ac a yw'r rhain yn hwyluso gweithio amlbroffesiynol;
- I ba raddau y byddai cymhellion a/neu amodau yn hybu addysgu, hyfforddi a chadw gweithwyr iechyd proffesiynol ledled Cymru;
- Sut y mae anghenion a safonau gofal iechyd yn llywio cynllunio, dylunio rolau a chomisiynu addysg.

Amgaeir Cylch Gorchwyl yr adolygiad hwn ynghyd â gwybodaeth bellach am aelodau'r panel.

Rwyf yn disgwyl i'r panel gyflwyno ei ganfyddiadau erbyn diwedd y flwyddyn.

Rwyf yn angof copi o'r llythyr hwn at Gadeirydd y Pwyllgor Iechyd a Gofal Cymdeithasol ac yn wyneb materion trawsbynciol yr adolygiad rwyf hefyd yn anfon copi at Gadeirydd y Pwyllgor Plant, Pobl Ifanc ac Addysg.

In gywir,

Mark.

**Mark Drakeford AC / AM**

Y Gweinidog Iechyd a Gwasanaethau Cymdeithasol  
Minister for Health and Social Services

# Adolygiad o Fuddsoddi mewn Addysg i Weithwyr Iechyd Proffesiynol

## Cylch Gorchwyl

### Diben yr Adolygiad

Prif swyddogaeth y Panel fydd cynnal adolygiad ffurfiol o'r ffordd y mae Llywodraeth Cymru'n buddsoddi mewn cynllunio, datblygu a chomisiynu'r Gweithlu Iechyd yng Nghymru.

### Meysydd allweddol

Wrth gynnal yr adolygiad hwn bydd y panel yn:

- ymchwilio i'r trefniadau sy'n bodoli ar hyn o bryd ac yn nodi cryfderau a gwendidau'r system.
- dadansoddi'r buddsoddiad sydd wedi'i wneud mewn addysg Iechyd yng Nghymru; asesu i ba raddau y mae'r buddsoddiad yn dwyn ffrwyth ac a yw ar lefel briodol.
- ystyried y model presennol sef y 'model a reolir' ar gyfer comisiynu addysg sy'n cael ei fabwysiadu yng Nghymru ochr yn ochr â dulliau gweithredu eraill yn y DU / gwledydd eraill a darparu argymhellion am ddull gweithredu i'w fabwysiadu yn y dyfodol.
- ystyried a fyddai sefydlu un corff sy'n dod â'r swyddogaethau hyn ynghyd o fudd i Gymru ac os felly pa swyddogaethau y dylai eu cynnwys
- ystyried i ba raddau y gallai trefniadau sy'n seiliedig ar gymhellion fod o fudd i'r agenda addysg a hyfforddiant yng Nghymru.
- ystyried y dull gweithredu polisi ehangach mewn perthynas â gofal Iechyd darbodus a beth y mae hyn yn ei olygu i addysg a hyfforddiant gweithwyr gofal Iechyd proffesiynol a grwpiau staff.

### Amserlen

Bydd y Panel yn adrodd ar ei ganfyddiadau trwy gyfrwng adroddiad ffurfiol i'r Gweinidog Iechyd a Gwasanaethau Cymdeithasol erbyn diwedd Rhagfyr 2014.

### Dull gweithredu

Y panel yn cyfarfod i gytuno ar ddull gweithredu ar gyfer yr adolygiad.

### Ymgysylltu

Bydd y panel yn nodi rhanddeiliaid allweddol ac yn penderfynu ar fyrdde priodol o ymgysylltu ag unigolion / cyrff i ganiatáu i gasgliadau ac argymhellion gael eu seilio ar dystiolaeth briodol.

### Cymorth

Caiff yr adolygiad ei gynorthwyo gan Reolwr Adolygiad yng Nghyfarwyddiaeth y Gweithlu a Datblygu Sefydliadol yn Llywodraeth Cymru.

## Cadeirydd ac Aelodau'r Panel

### **Mel Evans - Cadeirydd**

Ar hyn o bryd Mr Evans yw Cadeirydd Bwrdd Addysgu Iechyd Powys. Ac yntau wedi cael ei addysg yn Ysgol Ramadeg Ferndale a Phrifysgol Lerpwl mae Mr Evans yn gyfrifydd cymwysedig a bu ganddo yrfa ym maes cyllid yn y sector cyhoeddus ehangach a'r GIG.

Ymhlith ei swyddi blaenorol mae Cyfarwyddwr Cyllid Awdurdodau Gwasanaethau Iechyd ac Iechyd y Teulu, Morgannwg Ganol; Cyfarwyddwr Cyllid a Cyfarwyddwr Contractio yn Awdurdod Iechyd Bro Taf a Rheolwr Cyffredinol Grŵp Iechyd Lleol Rhondda Cynon Taf, tan 31 Mawrth 2003. Bryd hynny penodwyd Mr Evans yn Brif Weithredwr y corff a'i holynodd – sef Bwrdd Addysgu Iechyd Lleol Rhondda Cynon Taf tan 2009, yr un pryd â'r swydd hon, rhwng 2007 a 2009, a bu hefyd yn Brif Weithredwr Bwrdd Iechyd Lleol Merthyr Tudful.

### **Yr Athro Ceri Phillips – Aelod o'r Panel**

Yr Athro Ceri Phillips yw Athro Economeg Iechyd a Dirprwy Bennaeth Ysgol (Ymchwil) ym Mhrifysgol Abertawe ac mae wedi meithrin cysylltiadau agos â'r Uned Gwella Clwyfau a'r Ganolfan Ymchwil i Anabledd ym Mhrifysgol Caerdydd a'r Uned Ymchwil i Boen yn Ysbyty'r Radcliffe yn Rhydychen. Mae'r Athro Phillips wedi ymgymryd â gwaith ymchwil ar ran ystod o sefydliadau, gan gynnwys Mudiad Iechyd y Byd, Llywodraeth Cymru, yr Adran Iechyd, yr Adran Gwaith a Phensiynau ac ystod o awdurdodau iechyd a chwmnïau fferyllol.

Mae'r Athro Phillips yn aelod o ystod eang o grwpiau a byrddau gan gynnwys Comisiwn Bevan, Grŵp Strategaeth Meddyginiaethau Cymru Gyfan (AWMSG), Is-gadeirydd ei Grŵp Meddyginiaethau Newydd a bu'n aelod o Grwpiau Datblygu Rhaglenni NICE ar ystod o faterion iechyd y cyhoedd.

Mae'r Athro Phillips wedi cyhoeddi dros 130 o lyfrau ac erthyglau mewn cyfnodolion ym maes economeg iechyd a pholisi iechyd.

### **Dr David Salter – Aelod o'r Panel**

Ac yntau wedi ymddeol bellach, Dr David Salter yw cyn Ddirprwy Brif Swyddog Meddygol (CMO) Cymru. Fel Dirprwy CMO, roedd Dr Salter yn rhoi cyngor a chanllawiau proffesiynol annibynnol i'r Prif Weinidog, Gweinidogion Llywodraeth Cymru a Chynulliad Cenedlaethol Cymru. Yn rhinwedd ei swydd fel Dirprwy CMO, bu Dr Salter yn arwain ar lawer o faterion sy'n effeithio ar iechyd pobl Cymru. Roedd y gwaith hwn yn cynnwys adolygiad o'r achosion o E Coli yn 2006. Gwnaeth yr adolygiad argymhellion i leihau'r risg y byddai achosion fel hyn yn digwydd eto.

Fel rhan o Banel Craffu yn 2013, lluniodd Dr Salter adroddiad ar gynigion ar gyfer newid mewn gwasanaethau mewn perthynas â gwasanaethau newyddenedigol yn Ysbyty Glangwili, Caerfyrddin ac Ysbyty Llwynhelyg, Hwlfordd.

### **Mr Dick Roberts CBE – Aelod o'r Panel**

Ar hyn o bryd Mr Roberts yw Dirprwy Ganghellor Prifysgol Caerdydd. Ac yntau'n gyn Brif Gynghorydd Optometrig Cymru bu Mr Roberts yn gyfrifol am Archwiliad Iechyd Llygaid Cymru ac am sefydlu Gwasanaeth Golwg Gwan Cymru. Fe lwyddodd i argyhoeddi'r proffesiwn i ymgymryd â hyfforddiant ac achrediad pellach er mwyn sefydlu lefelau cymwyseddau sydd hyd yn oed un uwch na'r rhai y mae eu hangen yn wladol.

Ac yntau'n Aelod o'r Cyngor Optegol Cyffredinol rhwng 1981 a-2006, bu'n gadeirydd ar y Pwyllgor Ymchwilio am 20 mlynedd. Yn rhinwedd ei rôl fel ymwelydd ar ran y Cyngor Optegol Cyffredinol bu'n ymweld â phob un o'r prifysgolion a oedd yn gyfrifol am addysg

optometrig i israddedigion ac fe luniodd Adroddiad Roberts ar brosesau disgyblu'r Cyngor a mabwysiadu newid.

Mae Mr Roberts wedi bod yn ddarlithydd gwadd yn yr Ysgol Optometreg a Gwyddorau'r Llygaid ym Mhrifysgol Caerdydd ac mae wedi bod yn uwch arholwr gyda Chymdeithas Optegol Prydain a Choleg Brenhinol yr Optometryddion.

